

النص المسرحى

حدوتة عواد المصرى

باللهجة العامية المصرية

تأليف

بسام حسن محمد

شخص الحكاية :

- ١- الراوى
 - ٢- عواد
 - ٣- محمد
 - ٤- الحاجة
 - ٥- سلامة كريم
 - ٦- شريف السوهاجى
 - ٧- مهندس املاك الاوقاف
 - ٨- محمود حمدى الكبير
 - ٩- وكيل النيابة
 - ١٠- صحفية
 - ١١- سفروت
 - مزارع ١
 - مزارع ٢
 - مزارع ٣
 - زوجة مزارع
 - صانع اسبته
 - مجاميع وحسب رؤية المخرج
- صحفى تحقيقات فى مجلة روزيوسف
- رجل فى الثانية والخمسون ؛ هادى ؛ ليس له اعداء
- ابن عواد ؛ طالب فى كلية الزراعة
- زوجة عواد فى الخامسة والأربعين من العمر
- صديق عواد فى الخامسة والخمسون من العمر
- مقاوول وصاحب شركة للاستثمار العقارى؛ انتهازى
- رجل فى منتصف الخمسينات من العمر ظالم؛ صادم
- مخامى الاهالى طيب ؛خدوم؛ جرىء
- عضو مجلس إدارة وكالة اخبار الشرق الاوسط وشمال افريقيا
- بلطجى

جغرافيا الحكاية:

ارض المعمورة

الزمان: قبل ثورة يناير ٢٠١١

المدخلترفع الستارة

نسمع فى الخلفية الاوبريت الشهير عواد باع ارضه يا ولاد لسعاد مكاوى وسيد اسماعيل)
 (بؤرة اضاعة على الراوى) الراوى : (يظهر الراوى وسط الجمهور) (يوجهه كلامه للجمهور) انا
 صحفى على قد الحال فى قسم التحقيقات فى صحيفة روز يوسف طلب رئيس تحرير الصحيفة الى
 بشتغل فيها من العبد الفقير لله اعمل تحقيقات وحوارات مع فلاحي ارض المعمورة والكشف
 بالمستندات تفاصيل السطو على اكثر من ٣٠٠ فدان يعيش عليها اكثر من ٥٠٠٠ اسرة من الفلاحين
 علشان مشروعات سكنية فاخرة وحكاية بيع يا عواد للارض (يوجهه كلامه للمزارعين وسط الجمهور
) نبدء من هنا الحكاية مع الفلاحين الغلابه وعم عواد

مزارع ١ : اخذ بطاقة حيازة الملكية من الزعيم الراحل جمال عبد الناصر شخصيا .. وكنت فى غاية
 السعادة والفخر لما وقف جنب الفلاحين .. واستمررت فى دفع الايجار للارض لهيئة الاصلاح الزراعى
 وصولا لهيئة الاوقاف .. رغم مش حقها الاشراف على الاراضى الى اتوزعت على الفلاحين .. وعلى كده
 التزم كل الفلاحين بالسداد .

مزارع ٢ : انا من مواليد سنة ١٩٣٣ .. ومليش مكان غير الارض .. الى كبرت فيها وزرعتها واتجوزت من
 خيرها .. وجبت اولادى واحفادى فيها والفلاحه هى عملى وعمل اولادى الوحيد منعرفش غيره .. من
 العقل ان الكبار عاوزين تبوير الارض الزراعية لبناء مساكن عليها .

مزارع ٣ : الارض عرض .. مش ممكن نتازل عنها الا واحنا جثث

زوجة مزارع : عمرى ٦١ سنة مشفتش مكان غير هنا .. اتولدت وعشت واشتغل ابويا وجوزى فى زراعة
 الارض .. مش حنخرج من ارضنا وبيوتنا حتى اخر نفس .

مزارع ٤ : الاراضى مزروعة بالجوافة وعلى طريق ابو قير اللاصق لخط السكة الحديد .. وتبعد عن
 شاطئ البحر ١٠٠ متر.. علشان كده عاوزين يطرودنا منها .

صانع اسبنة الخوص : احنا عايشين زى الفيران يا استاذ

الراوى : (يوجهه كلامه للجمهور) مكنش وعد بلفور الذى اغتصب الاراضى العربية الفلسطينية
 ليسلمها الى اسرائيل دون وجه حق الوحيد من نوعه فهناك الكثير من الفاسدين فى التاريخ يمارسون
 نفس الاساليب بأغتصاب الاراضى وطرد وتشريد الاهالى دون وجه حق ومنحها لمافيا الاراضى
 وعصابات السطو على قوت الغلابه والفقراء

(ظلام ويتوغل الراوى وسط الجمهور حتى يختفى)

(نسمع فى الخلفية موسيقى فيلم المواطن مصرى لياسر عبد الرحمن)

المشهد الاول

(فاصل من فيديو وثائقى لخطاب الرئيس جمال عبد الناصر لتوزيع الاراضى على الفلاحين)

(ثم ترفع شاشة السينما ليظهر المسرح)

(المسرح بيت عواد الريفى الصغير من دولاب وسرير وكرسين وكنبه قديمة الشكل فى منتصف البيت صورة الرئيس محمد حسنى مبارك وتكون زوجة عواد واقفة فى منتصف مندرة البيت ويدخل ابنها محمد)

الحاجة : (فى خوف) يا محمد ابوك الحاج اتاخر.. انا قلقانه

محمد : يا حاجة .. بلاش قلق

الحاجة : مش من عادات ابوك الحاج التاخير حتى العشا

محمد : لعل الامر خير ان شاء الله

الحاجة : (تنظر الى السماء داعيه) يارب

محمد : هو لما رجع من الارض قالك هو حيروح فين ؟

الحاجة : لما رجع من الارض بعد صلاة الظهر اكل ونام شوية وراح لصلاة العصر فى الجامع اللى على اول الطريق

محمد : لما كنا فى الارض مع بعض وسط الفلاحين قالى انه بعد صلاة العصر رايح مشوار ضرورى

الحاجة : ربنا يستر

محمد : انا جعان يا ما .. طول النهار واقف على رجليا مااعدش دقيقة

الحاجة : عامله شوية اكل .. حكاية

محمد : هاتكلىنى ايه علشان اكل واخش اريح شويه

الحاجة: (بسعادة) اكل انت بتحبه

محمد : ايه ؟

الحاجة : شوية سمك مقلى مع شوربة سمك وطبق رز احمر هتاكل صوابعك وراهم

محمد : انتى نزلتى السوق ؟

الحاجة : روحت حلقة السمك فى ابوقير ورجعت على طول فى القطر

محمد : كلام جميل .. كلام معقول .. مقدرش اقول اكتر من كده

الحاجة : اكل فاخر من الاخر .. يعوض تعب طوال اليوم فى الشغل .. ولا ايه يا ولدى

الحاجة : الحال فى الارض ايه .. طمنى يا ولدى

محمد : احنا فى موسم زرعه الجوافة

الحاجة : من يوم ما جينا الدنيا والمعمورة مشهورة بزرعه شجرالجوافة

محمد : علشان كده اشتهرت المعمورة بارض الجوافة

الحاجة : احلى جوافة .. فاكهة الغلابة

محمد : شجرالجوافة مصدر رزقنا .. وقوت الفلاحين الغلابه

الحاجة : مع الكوسة والطماطم والفلفل

محمد : و البلح

الحاجة : شجرالجوافة مشهور فى المعمورة البلد من ايام الملك والناس البشوات

محمد : يا سلام

الحاجة : حكاوى وحواديت جدك الله يرحمه من زمان عن الارض

محمد : جدى شاف السكة الحديد

الحاجة : ايوا

محمد : والله

الحاجة : وصله خط سكة حديد حتى ابوقير .. كانت خط واحد رايح جاى .. علشان جلاله الملك

محمد : (يضحك) عاشت مصر .. عاش الملك .. عاش الهلال مع الصليب

(نستمع صوت سير القطار وصفارته فى الخلفية)

الحاجة : جدك الله يرحمه كان شغال فلاح بيومية عند الملك فى مزارع الجوافة والبلح والغله

محمد : فين ؟

الحاجة : فى اراضى البستان الى عاملها الملك علشان نفسه والامراء والباشوات .. فى القومبانية

الإنجليزية والتى كانت وقف لصالح ورثة الخديو إسماعيل

محمد : الزمن الجميل والعيشه الحلوه

الحاجة : بس الناس كانت غلابه على اد الحال .. والدنيا كانت ضيقه

محمد : وراح الملك وجت ثورة ٥٢ والرئيس عبد الناصر ووزع الارض على الفلاحين

الحاجة : الدنيا اتغيرت.. دوام الحال من المحال

محمد : وابن خول الجنينة بقى ضابط جيش.. واتجوز الاميرة بنت الباشوات

الحاجة : ده فيلم رد قلبى بتاع شكرى سرحان وصلاح ذو الفقار.. يا خفيف

(يدخل عواد)

عواد : السلام عليكم يا حاجة .. (يوجهه كلامه لمحمد) عامل دوشه ليه يا ولا

محمد : مفيش حاجة يا بابا

عواد : صوتك على فى ايه ؟

محمد : شوية دردشة مع امى

الحاجة : كنت فىن يا حاج ؟ قلقت عليك

محمد : (بضحك) عند مراته الثانية

عواد : ياريت يا ولا يا محمد .. اه ه ه

الحاجة : (بصوت منخفض) ليه كده يا حاج .. ده انا معاك على الحلوه والمره

عواد : (يقترب منها) انتى ست الكل .. انتى العمر كله يا ام محمد

محمد : (ضاحكا) اجيب ٢ عصيرمانجا والقعده تحلو واطلع منها بقى (يصفق فى اخر كلماته مع ضحكات شريره)

عواد : انت عاوز توقع بينى وبين امك .. يا واد يا فقرى انت

محمد : انا محضر خير .. والله

الحاجة : انت ابليس .. شيطان

محمد : خلاص .. اطلع منها بقى

الحاجة : بجد يا حاج اتأخرت ليه؟

عواد : مع الفلاحين فى الجمعية الزراعية .. اما الواحد تعبان بشكل

محمد : خير يا حاج !!

عواد : بنفكر فى عمل نقابة للفلاحين تدافع عن حقوقنا وتحل مشكلنا

محمد : صح يا بابا .. النقابة مشروع ومنفذ قوى للتعبير عن الفلاح

الحاجة : الارض بتموت يوم ورا يوم

عواد : الارض غرقانه ميه صرف صحى وصرف مصانع .. الاتنين

محمد : بسبب المصانع الى حوالينا

عواد : اه

الحاجة : مصانع ايه ؟

عواد : مصانع الاسمدة و الورق الى فى عزبة الحاج محمد

الحاجة : ربنا يعديها على خير

عواد : المجارى دمرت الارض الزراعية فى كل عزب المعمورة

محمد : ميه ملوثة

عواد : المحصول نزل النص وكل سنة بيقل عن السنة الى قبلها والحال واقف و الخسارة كبيرة على الفلاح

محمد : والحل ؟

عواد : سنين طويلة بندور على الحلول

محمد : (ضاحكا) مفيش فايده... قالها من زمان الزعيم سعد زغلول ..الله يرحمه

الحاجة : ليه كدة يا بنى ؟

عواد : الحل فى ايد موظفى الحى و شركة الصرف الصحى والاصلاح الزراعى

محمد : الله غالب

الحاجة : خلى عندك امل

محمد : هيجى منين الأمل يعنى

عواد : سبحان الله مغير الاحوال

الحاجة : إلهى يبارك فيك ويخليك للغلابه ياكبير البلد والناس

محمد : ومية الشرب ؟

الحاجة : المية عجيبة الشكل.. فى الحنفية.. لا لون ولا طعم والريحه وحشة

عواد : ميه الصرف دخلت على ميه الشرب

الحاجة : لا حول ولا قوة الا بالله

محمد : المشاكل عند الفلاحين كتير.. والحلول متأخرة

الحاجة : وباقي الناس الغلابه

عواد : الفلاحين ايد واحدة على قلب رجل واحد.. وانت معنا يا محمد

محمد : اعملوا اللي انتوا عاوزينه لوحدكم

عواد : (فى دهشة) ازاي مين يشيل حمل الارض بعد منى؟

الحاجة : بعد عمر طويل يا حاج

محمد : انا مش قاعد فيها.. انا مسافر بعد ماخلص دراسة فى الكلية

عواد : تسافر بره مصر وتسبب البلد

محمد : اه

عواد: يا خسارتك يا بلد .. بترى فى رجاله مش بتوعك (يصفق يد على يد) لا حول ولا قوة الا بالله

محمد : انا مضطر

شندى : معلىش قول تانى

محمد : حشوف عقد عمل فى اى دولة فى الخليج السعودية او دى او الكويت

عواد: وارضك واحنا .. عايز تشتغل عند الناس .. تشتغل فى ارض الاغراب

محمد : عايز اكون نفسى ومستقبلى.. واعمل قرشين للزمن

شندى : انا دخلتك كلية زراعة وتعبت وشقيت عليك .. علشان تسافر وتسبب اهلك وارضك وبلدك

محمد : القرش الابيض بينفع فى اليوم الاسود

الحاجة : اقعد ازرع ارضك .. وونس دارك .. بكرة تتجوز .. عمر الى بيروح ما يرجع تانى

عواد : الارض عرض.. والفلوس بتيجى وتروح

محمد : يا با ..عايز اسافر.. واشتغل واجيب فلوس.. واتجوز.. واعمل اى مشروع صغير يكسر الدنيا

عواد : بلاش كلام فارغ

الحاجة : (بحزن) عايز تسيب امك وابوك يا محمد

محمد : الرزق بيحب الخفيه يا امي

الحاجة : مطمرش فيك تربية امك وابوك .. يا قهره قلبى عليك (تبكى)

محمد : متزعليش يا اما .. هو انا مسافر دلوقتي

عواد : الجيل ده دماغه جزمه قديمه .. متزعليش يا حاجة

(يدخل سلامة كريم)

سلامة كريم : السلام عليكم

عواد: وعليكم السلام

سلامة كريم : ازيك يا عواد

عواد : قرفان .. زهقان .. مضايق

سلامة كريم : وحد الله

عواد : لا اله الا الله

سلامة كريم : خير

عواد : حروح مشوار صغير .. وراجع ع طول

سلامة كريم : رايح فين الساعة ديه

عواد : رايح الجمعية الزراعية

(يخرج عواد)

سلامة كريم : قولى صحيح .. حتسافر يا محمد ؟!

محمد : (صمت) ان شاء الله.. انا بكرا ماشى من المخروبة دى

سلامة كريم: عرفت حتعمل ايه !

محمد : بعد التخرج يا عمى الحاج .. حشوف شركات سفريات والحق عمالة بالخارج

الحاجة : مش عارف مصلحتك يا محمد .. رب هنا هو رب هناك

محمد : انا خلاص حاعيش بره مصر

الحاجة: ربنا يهديك ويصلح حلنا وحالك

محمد : ياما .. رزقي بره البلد

سلامة كريم: الغربة صعبه .. بتهد رجال . وسنين بتضيع من عمرك .. الناس بتموت في الغربة ببلاش

محمد : وهنا .. (صمت) ما بيموتوش

الحاجة : مش عاوز يسمع لاي حد

محمد: مرار الغربة وسط بيتي واهلى وناسى اكبر من مرارتها في السفر

الحاجة : (وكأنها لم تسمعه) مش عاوز يفهم او يعرف اى شىء

محمد : ياما بلاش تقفوا كلكم قصاد حلمى وطموحى

سلامة كريم: فكر .. من غيرك ارضك حتضيع.. الفلاح من غير الارض عريان

محمد : كفاية فقر بقى

الحاجة : بطل ندب ..فوق بقا من اللى انت فيه

محمد : كتر خيرك ياما

سلامة كريم : ابوك بيعمل كل ده لمين ..بيحارب هنا وهناك ..مش ليك

محمد : انا لازم اخطط للجى

سلامة كريم: يا عم قول يارب

الحاجة : ابوك الحاج تعب وشقى وعافر في الدنيا علشان يأكلك ويلبسك ويعلمك احسن تعليم وتدخل كلية الزراعة وتخرج بشمهندس زراعى وترعى الارض بعلمك وعرقك

محمد : متحاوليش .. الكلام في الموضوع ده .. خلاص انتهى

الحاجة :عاوز تسافر .. وتسببها لمين .. ابوك بيكبر في السن

سلامة كريم : والله حرام .. شىء يزعل الواحد و يبكى القلب

الحاجة : جت الحزينة تفرح ملتئش ليها مطرح

محمد : ياما .. هنا الحال يصعب على الكافر

الحاجة : لا اله الا الله.. ولا حول ولا قوة الا بالله

(نسمع صوت مرتفع للتلفزيون)

صوت الاخبار: وقد توفي البوعزيزى فى مستشفى بن عروس بسبب حروقه البالغة الذى قام بأضرام النار فى جسده تعبيرا عن غضبه على بطالته ومصادرة العربة التى يبيع عليها من قبل الشرطة فادية حمدى وادى ذلك الى اندلاع شرارة المظاهرات فى تونس الراضين لما اعتبروه اوضاع البطالة وعدم وجود العدالة الاجتماعية وتفاقم الفساد

محمد : ياما مشفتيش الشاب الى حرق نفسه فى تونس.. الخبر مذاع على التلفزيون

الحاجة : مات كافر..حرق نفسه.. والله اعلم

محمد : يا ما.. العلم عند الله ..مات علشان غيره يعيش ..انتحر ليكون جرس انذار للحكومات والشعوب .. كفايه .. الناس جابت جاز

الحاجة : بس مات .. وربنا غضبان عليه

محمد : يا ما .. فى كل زمن من الازمنه .. لازم يكون واحد بيضحى بحياته علشان الناس

سلامة كريم : وايه الى حيكون .. احمد زى الحاج احمد

محمد : الولد بتاع تونس حيكون شراره نار.. لكل الناس الغلابه فى كل حته

سلامة كريم : شىء بشع .. كل القنوات الاخبارية فى التلفزيون .. جاييها ..ليل نهار

محمد : يا عمى سلامة.. جيلكم هو الى ضيع البلد ..الجيل بتاع ثورة ٥٢ وبعدها نكسه ٦٧ وبعدها نصر اكتوبر ٧٣ ..ومفيش جديد .. جيل عايش يأكل ويشرب وينام.. وشكر الله سعيكم

سلامة كريم : اتهام باطل

الحاجة : قول يا فليسوف عصرك

محمد : احنا جيل مواليد اخر السبعينات واوائل الثمانيات .. عصر الدش والنت والموبيل والتكنولوجيا

سلامة كريم: الزمن غير الزمن .. والدنيا اتغيرت

محمد : أنتم واللى زيكم عمركم ما حلمتموا تغيروا الواقع الى انتوا عايشينه

الحاجة : أنت ابن كلب طول عمرك ودماغك حجر .. كفاية بقى يا شيخ أنت إيه

(نسمع فى الخلفية موسيقى فيلم الهروب لمودى الامام)

(ظلام)

المشهد الثانى

(يفتح الستار ونشاهد وقفة احتجاجيه من مجموعة من الرجال والأطفال والنساء من فلاحي ارض المعمورة امام يافته مبنى الجمعية الزراعية رافعين لافتات مكتوب عليها لا للبيع ..لا للتهجير)

(يدخل عم عواد وسلامة كريم يحيط به مجموعة من الفلاحين)

سلامة كريم : البلد كلها جايه ..واقفين ..وعاملين مظاهرات .. ومش عاوزين يمشوا

عواد : (غاضبا) الجمعية الزراعية مش عايضة تصرف تقاوى لينا.. يا حاج سلامة كريم

سلامة كريم : علشان يتنازل الفلاحين عن ارضيهم بالعافيه .. يا عواد

عواد : دماغ شياطين

سلامة كريم : (غاضبا) وعازين يمشوهم على ايصالات امانة وشيكات على بياض .. علشان ياخدوا الفلاحين من الجمعية التقاوى للارض الى ييزوعها

عواد : من الاخر .. الارض او السجن .. مفيش هروب

سلامة كريم : قبضوا على فلاحين من العزب الى جنبنا من بيوتهم نص الليل من وسط عيالهم

عواد : من غير تهمه؟!

سلامة كريم : التهمه هى اغتصاب ارض الغير ومقاومة السلطات

عواد : ظلم فى ظلم

سلامة كريم : واتحكم عليهم بالحبس خمس سنوات

عواد : (مندهشا) من غير احكام قضائية؟!

سلامة كريم : الحكم طلع فى ٤٨ ساعة

عواد : (يتقدم وسط المكان) احنا جمعنا كل فلاحي العزب ال ٢٢ الى جنبنا .. وعملنا وقفة احتجاجيه فى الجمعية الزراعية علشان نطالب بحقوقنا ونرفع الظلم عنا

سلامة كريم : الحق لازم يرجع لصحابه يا عواد

عواد : الفلاحين املهم بعد ربنا كبير فينا

سلامة كريم : انت كبير الفلاحين فى ارض المعمورة والاصلاح يا عواد .. ووو..

عواد : (مقاطعا) وقطعوا ميه الرى العذبه عن الارض

سلامة كريم : والبديل لروى الزرعه

عواد : ميه الصرف الصحى لرى الارض

سلامة كريم : الميه الى جابت للفلاح الفشل الكلوى والامراض الوحشه يا عواد

عواد : وعلشان يغيروا طبيعة الارض .. رصفوا الطرق والشوارع ودخلوا المرافق كهربا وميه وغاز

سلامة كريم : اه .. الورق ورقنا والدفاتر بتاعتنا .. تلاعب بالقانون

عواد : على عينك يا تاجر .. فى عز الضهر

سلامة كريم : قانون ساكسونيا

عواد : وياريته تيجي كده وبس .. ادارات الكهرباء والميه والغاز فرضت غرامات عدم تحصيل على الفواتير للفلاحين

سلامة كريم : دايرة مقفولة

عواد : (ساخرا) اما دفع الفلوس او شيل العدادات

سلامة كريم : وهدم البيوت على دماغنا بدون سابق انذار

عواد : لارغامنا على التنازل عن الارض مقابل شوية فلوس على انها خلو رجل

سلامة كريم : يعنى اللي تقول عليه الحكومة شمال يبقى شمال .. واللي تقول عليه يمين هايبقى يمين

عواد : إحنا نحمد ربنا يا حبيبى أنهم سايبنا عايشين

سلامة كريم : أنت بتقول كلام يودى فى داهية

عواد : ع الله .. ربك موجود

(المقاول يدخل يحيط به مجموعة من البودى جارد)

المقاول : ازيك يا عواد

عواد : عال .. الحمد لله يا بيه

المقاول : صباح الفل يا جماعة

سلامة كريم : نورت شريف بيه

المقاول : يا جماعة الى بتعملوه ده مش صح

عواد : ليه ؟

سلامة كريم : قولنا جنابك الصبح و احنا نعمله

المقاول : نلم الموضوع .. وكل واحد يروح بيته

عواد : الناس جابت جاز

سلامة كريم : اهانات وسرقه ونهب وقله أدب

المقاول : كل مشكلة وليها حل

عواد : مش فاهم حاجه ؟ يا استاذ

المقاول : احنا مصالحنا واحده

سلامة كريم : البلد جايه على الغلاية

المقاول : يا اخوانا مينفعش كده

عواد : الحكومة والمعارضه باعت الاهالى

المقاول : الكلام ده مضحك وكله غلط .. حكومة ومعارضه مع بعض .. تيجى ازاي ؟

سلامة كريم : زى الناس .. الدنيا مصالح بتتصالح

عواد : بتتصالح على رزق الناس وأكل عيشهم .. السياسة لعبة وسخه

المقاول: انت بتقول ايه؟!

عواد : الى سمعته .. الناس مش حتمشى من هنا .. غير لما تأخذ حقوقها

المقاول: انت راجل غريب .. انا ما شفتش حد كده فى الدنيا

سلامة كريم : ما غريب ألاً.....

عواد : الشيطان هو انت يا بيه .. والغريب هو انت

المقاول : يا جدع لم لسانك

عواد : وعمايلك إنت والمقاطيع بتوعك

المقاول : تصدق بربك .. انت راجل مش تمام

سلامة كريم : خبر ايه يارجاله .. ماتصلو عليه

المقاول : خبر أيه يا عواد

عواد : غريب ؟! .. علشان بدور على حقوق الفلاحين

المقاول: خليك في حالك انت يا عواد

عواد : اخليني في حالي ازاي؟!

المقاول : زي كل الناس اللى في حالها

عواد : لا مينفعش .. انا واحد من الناس

المقاول : (بعصبية) كفايه .. كفايه .. انت غاوى زعامه ولا ايه ؟

عواد : هو انا مش معاهم في الوقعه الطين

سلامة كريم : الصبر ليه حدود

المقاول : شوف بأه يا عواد .. خلى بالك من نفسك .. انت بتلعب بالنار

عواد : النار مابتحرقش مؤمن

سلامة كريم : ما توديش نفسك في داهية .. اللي مش مالي عينك ده اهم رجل في المحافظة كلها .. وكل يوم تظهر صورته في الجرايد والإذاعة والتليفزيون

المقاول : خلاصة القول .. علشان احنا اهل .. اتلمو شويه فاهمين ؟

سلامة كريم : ربنا يصلح حالنا وحالك

المقاول : انا هسيبك بقي يا عواد .. سلام (ينفجر في الضحك وهو يغادر المكان)

عواد : لعنة الله على الظالم وابن الحرام .. اسمعوا يا ناس .. (صمت)

ربنا يصبركم على ما بلاكم .. وان شاء الله الشده ح تزول مادمننا

عارفين اسبابها

سلامة كريم : حنعمل ايه دلوقتي .. الدنيا كلها ضدنا

عواد : في الإتحاد قوه

سلامة كريم : كله تمام بفضل الله

عواد : ربنا ليه وقته واكيد ربنا مش ناسينا

سلامة كريم : (يتلفت حوله) انا شايف في الوقفة عدد كبير من الناس اول مره اشوفها مش من الفلاحين

عواد : فعلا..عندك حق

سلامة كريم : (مندهشا) مين دول يا عواد ؟

عواد : صحفيين واعضاء مجلس الشعب والشورى وبتنوع منظمات المجتمع المدنى و التلفزيون

سلامة كريم : (بتعجب) قنوات تلفزيونات عربية و اجنبية!

عواد : الجزيرة القطرية والعربية السعودية و والسى ان ان والبى بى سى و القناة الخامسة

سلامة كريم : يا سلام .. بقيت عالمى يا عواد زى بتنوع الكرة

عواد : عجبتك صح!

سلامة كريم : انت كبير الناس والبلد يا عواد

عواد : (متحمسا) مهو ده برضه مش كفاية أبدا

(تدخل الصحفية)

صحفية : (انجليزى) Good Morning

عواد : ايوه

صحفية : صباح الخير

عواد : وعليكم السلام ورحمه الله وبركاته

صحفية : مين عم عواد ؟

عواد : العبد الفقير لله

صحفية : (انجليزى) How Are You

عواد : مش فاهم حاجة

صحفية : ازاي حضرتك

عواد : الحمد لله.. عايش

صحفية : انا مراسله صحفية لوكالة اخبار الشرق الاوسط وشمال افريقيا

عواد : اهلا وسهلا .. خير يا بنتى

صحفية : خير يا حاج ان شاء الله

سلامة كريم: نورقى ارض المعمورة

صحفية : شكرا جزىلا

عواد : تحت امرك

صحفية : كنت عاوزة انقل الى بيحصل هنا من ظلم للفلاحين .. و فساد المسؤولين من خلال الكلام معاك

عواد : انا !

صحفية : ايوة انت

عواد : (ضاحكا) احنا كويسين قوى قوى

صحفية : عاوزين نعرف مشكلتك

عواد : اقول ايه ؟..

صحفية : أنت ايه حكايك بالضبط ؟

عواد : شويه خلاف مع الفلاحين .. وربنا كبير

سلامة كريم : صح .. كلام مظبوط

صحفية : وبعدين ؟

عواد : خلينى ساكت

صحفية : مش عايز تتكلم .. انت خايف ولا ايه ؟

عواد : يا بنتى .. انا مبخفش غير من الخالق

صحفية : طيب ما تتكلم يا حاج .. لازم الناس كلها تشوف وتعرف الى بيدور فى ارض المعمورة

سلامة كريم : وليه الفضايح بس

صحفية : احنا هنا لمصلحتكم

عواد : انا مش موافق ان مشاكلنا تكون على عينك يا تاجر

صحفية : ده دور الاعلام فى العصر الحديث .. المصداقيه والوضوح فى نقل الحقيقة

عواد : طيب ما اتنقلوا الى بيحصل عندكم فى بلادكم من مشاكل ومصايب وبلاوى بوضوح للناس .. بدل ما اتنقلوا عن بلاد تانيه .. وتخربوا بلاد الناس .. جحا اولى بلحم توره

سلامة كريم : فى حد بعيد بيحرك الموضوعات علشان يورطنا
صحفية : مفيش الكلام ده الى انتم بتقوله .. احنا بنحاول نتواصل مع كل فئات الناس
سلامة كريم : ياريت
صحفية : يا عم عواد .. ارجوك .. كلمة اخيرة
عواد : انا مواطن عادى جدا .. بيعانى نفس معاناة الى بيشفوها كل مواطن مصرى غلبان
صحفية : يعنى مش عاوز تتكلم .. وتحكى اى حاجة للاعلام
عواد : معلش يا بنتى .. مسألة مبدأ .. خلينا لما الظروف تتغير
صحفية : اشكرك يا عم عواد .. ومعلش لو طولت عليك شوية .. سلام مؤقت
عواد : لا شكر على واجب
صحفية : (انجليزى) Good Bay

(تخرج الصحفية)

سلامة كريم : دا أنت دلوقت رجل الساعة والإذاعات الجنبية والجرايد والمجلات
عواد : لازم صوت الفلاحين يوصل لكل الناس .. ديه قضيتنا
سلامة كريم : قضية وطن وارض و ولد .. قضيتك يا عواد
عواد : صوتنا حيوصل للرئيس و لمجلس الوزراء ومجلس الشعب والتلفزيون والجرايد
سلامة كريم : فوق كل طبلية اكل .. عليها عرق فلاح جعان
عواد : (وكأنه يحدث نفسه) الفلاح يزرع ويروى ويعزق ويسهر على محصوله ويأكل عيلته ويأكل منه
جيرانه وفى نهاية الخدمة يطرد من ارضه

(لغط كثير وتداخل فى الأصوات من الخارج)

يا حكومة قوم قوم .. كل الظلم نهايته اليوم
مش حنروح مش حنخاف .. يمشوا اتنين يجوا ألاف
(تكرار)

(نسمع فى الخلفية موسيقى فيلم الارض لعلى اسماعيل)

(ظلام)

المشهد الثالث

(يفتح الستار على ارض زراعية ويدخل عواد والمقاول)

المقاول : ايه ياعم ده الواحد ساعة علشان يركن العربيه

عواد : اهلا يا شريف باشا

المقاول : ربنا يحفظك يا عواد

عواد : منور معالى الباشا .. ارضنا

المقاول: الارض منوره باهلها وناسها

عواد : يارب تكون الزيارة خير

المقاول: أنا محبش حد يكون زعلان مني .. عايز اكون متصالح مع كل الناس.. انا عايز الخير ليك ولكل الفلاحين

(يشعل المقاول سيجارة)

عواد : يا باشا انت رجل مقاول قد الدنيا .. اما احنا شويه فلاحين غلابه

المقاول : انتم اهلى .. انا واحد منكم

عواد : اسمع كلامك اصدقك .. اشوف عمايلك استعجب

المقاول : اول القصيدة كفر .. يا عواد

(يدخل سلامة كريم)

سلامة كريم : صباح الخير.. شريف بيه

المقاول : صباح الفل يا حاج سلامة كريم .. اخبارك ايه .. مش باين.. محدش بيشوفك ليه ؟

سلامة كريم : الشغل والارض .. وام العيال (ضاحكا)

المقاول : ربنا يحفظك وبحفظ اهل بيتك

سلامة كريم: شريف بيه .. ليا طلب صغنن

المقاول: انت تؤمر

سلامة كريم : عايز اشغل البنت الكبيرة فى اى مصلحة حكومية بدل قاعدتها فى البيت .. عقبال ما تتجوز ويجلها ابن الحلال

المقاول : (يضحك) شوفت يا عواد .. الى احنا كنا بنتكلم عنه

عواد : الله غالب

سلامة كريم : معلش يا شريف بيه .. كمان الولد الصغير ابني عاوزين وسطه منك تنقله من قاعدة رأس
تين العسكرية لقاعدة ابى قير جنب البيت

عواد : كمان

المقاول : حاضر .. ربنا بسهل يا حاج سلامة كريم

عواد : الكلام ده محتاج عزومه على اكل

سلامة كريم : احلى عزومه على سمك بحر من حلقة ابوقير للبasha

المقاول : خلص الكلام .. امين

سلامة كريم : نقرا الفاتحة

عواد : تقريبا البasha مش حافظها

المقاول : انت على طول الخط ظلمنى يا عواد

عواد : انا من سنين مشوفتش مسئول فكري ييجى المعمورة يشوف إيه أخبارنا.. ببيجوا يضحكوا علينا
بشويه كراتين زيت وسكر .. ومنشفش اى حد بعد كده

المقاول : انا جاى فى حوار تانى .

عواد : أنت ح تدخل مجلس الشعب

المقاول : الانتخابات مش على الأبواب

سلامة كريم : يا أستاذ احنا مش فاهمين حاجة... فهمنا علشان نعرف راسنا من رجلينا

المقاول : مش حوار انتخابات

عواد : ربنا يستر

المقاول : مصلحه لوز اللوز

عواد : مصلحه؟

سلامة كريم : اصبر يا عواد .. نسمع كلام شريف بيه

المقاول : ايوه ... مصلحه

عواد : لمين ؟

المقاول : أنت ابن حلال يا عواد

شندى : لية .. مفيش بينى وبينك مواضيع ولا حورات

المقاول : فية مصلحة شغل.. شغل عظمه من الاخر يعنى

عواد : شغل معاك مش ممكن.. هى الحدايه بترمى كتاكيت

المقاول : لية بس دى شغلانه كويسه

عواد : يا كبير انا شغلى مش من شغلك ... أنا فلاح غلبان وأنت راجل مسؤول .. ومقاول قد الدنيا ..
ايه هايجيب الفلاح للمسؤول الكبير

سلامة كريم : صح .. الى يجيب البحر جنب الترعه

المقاول : طيب نسمع شويه

عواد : ماشى .. ندخل فى الموضوع على طول

المقاول: الارض

عواد : مالها

المقاول: بيع الارض

سلامة كريم : يا بايع الارض والعرض ملعون

عواد : ابيع الارض

المقاول : يا عم عواد .. احنا عاوزين نشترها منك باى تمن تقول عليه

عواد : الفلوس مش كل حاجة.. ولا كنوز هارون

المقاول : الجنية غلب الكارنية يا عواد .. الفلوس العصا السحرية

عواد : كلام نهائى .. الارض مش للبيع

المقاول : مسمعتش رد الحاج سلامة على العرض

سلامة كريم : مفيش كلام يتقال بعد كلام اخويا عواد

المقاول : لازم ناخذ حته الارض ديه باى طريقة

عواد : (ينظر اليه باحتقار) بالقوة .. بالعافيه .. غصب عننا

المقاول : اشترينا الاراضى الزراعية كلها من الفلاحين ماعدا ارضك يا عم عواد و كمان ارض صحبك سلامة كريم

عواد : محصلش

المقاول : على الطلاق حصل

سلامة كريم : مش معقول

المقاول : الدنيا واقعه والناس بتصوت

عواد : لا حول ولا قوة الا بالله

المقاول : انا فلوسى عايزه أستثمرها .. وعايزين نستفيد كلنا .. ونلعب اللعبة الكبيرة ..

عواد : الارض على جثتنا

المقاول: حتاخد فلوس كتير تعوضك .. انت والحاج سلامة كريم

عواد : **(بصوت مرتفع)** الارض زى العرض .. واللى يفرت فى ارضه يفرت فى عرضه

المقاول : عم عواد الكلام اخد وعطا .. الكلام رايح جاى

عواد : مفيش اى حكاوى او حوادث بنا

المقاول : ارضك يا عواد و ارض الحاج سلامة كريم .. جزء من المشروع السكنى من ابراج وشقق بملايين

عواد : الله الله، وبعدين

المقاول : و دور سينما ومستشفيات خاصه خمس نجوم وعيادات ومطاعم سياحية ومحلات تجارية ومول تجارى على اعلى مستوى وفنادق سبع نجوم

عواد : **(ضاحكا)** احنا فى زمن التفاهات

سلامة كريم : كل حاجة خمس نجوم .. مفيش مدارس حكومية جديدة للعيال ولا مستشفيات قريه للمرضى بأجر رمزى ونعمل شويه مصانع علشان العيال العطلانه تلاقى شغل

المقاول : ان شاء الله.. حناحاول

سلامة كريم : البيت بيت ابونا والغرب بيطردونا

عواد : **(مندهشا)** وحتطرد الفلاحين الغلابه من الارض

المقاول : مشروع ضخم ويزنس حلو.. العائد كبير يا عواد .. رجال اعمال كبار عرب من الخليج ومصريون فى المشروع

عواد : (بقرف) شغل على جثث الغلابه

المقاول : (ضاحكا) العائد فلوس زى الرز .. خبطه العمر .. شغل على ميه بيضا

عواد : (غاضبا) ليه هنا بالذات .. ارض الله واسعه

المقاول : (يسير اليه) المكان متميز لاي مشروع سياحى او سكنى فاخر الجنب الثانى شاطئ المعمره وحدائق المنتزه على مسافه قريبه والقاطع خط سكه الحديد بتاع قطراى قير وعلى مسافات مش بعيدة الطريق الدولى لاي حته داخل اسكندرية وخارجها

عواد : (يبتعد) أهج من البلد ولا اعمل إيه بس

المقاول : هو دا حال الدنيا .. ارزاق وربك مقسمها على العباد

عواد : الارض مش زى كراتين الزيت والسكر للغلابه

المقاول : بيع يا عواد لينا .. وخذ فلوس كتير تكفيك .. علشان بيتك وابنك

عواد : (وكأنه يحدث نفسه) ارضى مش للبيع .. انا مش عواد الى باع ارضه

المقاول : الفلاحين الغلابه شافوا الفلوس باعوا اراضيهم وكان ممكن يبيعوا عيالهم

عواد : الناس غلابه .. والرزق قليل .. والحال لا يسر عدو ولا حبيب

المقاول : حتاخذ سعر اعلى من سعر بيع ارض اى فلاح .. اضعاف

عواد : احنا كدة بنضيع وقت على الفاضى .. وبنحرق بنزين

سلامة كريم : يا شريف بيه .. البنزين غالى ومش موجود

عواد : الجاز غلى قوى

المقاول : بلاش دماغ ناشفه

عواد : دماغى انشف من الحجر الصوان

المقاول : حنكرها

سلامة كريم : بلاش لغة التهديد معنا .. انت الخسران فى النهاية

عواد : ده تهديد ليا .. اعلى مافى خيلك اركبه .. والى عندك اعمله

المقاول : مش حتقدر على الناس دول.. دول حيتان كبار

عواد : ربك كبير

المقاول : بس انت ضعيف

عواد : حنشوف

المقاول : مش هتقدر

عواد : يا سيدى حجرب .. مش خسران حاجة

المقاول: يعني مفيش فايدة .. مش ناوي ترجع عن اللي في دماغك

عواد : والله لو انطبقت السما على الأرض

المقاول : (بقوة) كده انت بتضرب دماغك في الحيط .. وبتحارب طواحين الهوا

عواد : أنت جاي ترمي بلاك علينا

المقاول : انا زى الخازوق

عواد : و احنا دماغ صعايدة .. ناشفه

المقاول : عامل فيها زعيم الفلاحين وثورجى يا عواد

(يطفى السيجارة ويتعد عن عواد)

عواد : (بجدية) الكلام خلص لحد كده .. نورت يا شريف باشا

سلامة كريم : طب وريني كده هتعمل إيه

المقاول: يعني ده آخر كلام عندكم (يهم بالخروج)

سلامة كريم : ما فيش حاجة هنا هتلاقيها تنفعك

عواد : (وكأنه يحدث نفسه) غور في ستين داهية

(يخرجون)

(نسمع في الخلفية موسيقى مسلسل رأفت الهجان لعمار الشريعى)

(ظلام)

المشهد الرابع

(نفس المنظر السابق نشاهد زحام من الفلاحين فى شبة مظاهرة وصوت معدات الازالة وبوليس وامن يحاصر المكان)

سلامة كريم: (من الخارج) يا عواد .. يا عواد .. يا كبير الفلاحين

عواد : فى ايه ؟ يا شيخ سلامة كريم

سلامة كريم : شفت اللي حصل

عواد : أنا لحد دلوقت مش شايف حاجة خالص

سلامة كريم: الحكومة فى كل حتة الحكومة بتجرف الارض وتهد بيوتنا

عواد : والحكومة مالها ومالنا يا سلامة ؟

سلامة كريم: حملة ازالة كبيره من موظفى الحى ومهندسين الاوقاف والشرطة

عواد : ازالة ايه ؟ هى ناقصه

سلامة كريم : ازالة الارض المزورعة وهدم البيوت على رأس الفلاحين

عواد : فىن القانون ؟ فىن الحكومة ؟

سلامة كريم: بقولك يا عواد الحكومة هى الى بتنفذ الازالات

عواد : يا ترى ايه العبارة ؟

(يدخل محمد وامه)

محمد: (ضاحكا) العبارة فى الشيكارة يا ابويا

الحاجة : ده وقت هزار يا محمد فى الزنقه المهببه الى احنا فيها

سلامة كريم : قرارات ازالة صادرة من مديرية الاوقاف

عواد : قرارات ازالة على ارضنا وارض جدودنا

الحاجة: وراثتها اب عن جد عن جد .. لا اله الا الله

محمد: القرارات ديه باطله يا عمى سلامة كريم

سلامة كريم: يا محمد .. كله بالقانون

محمد: اى قانون .. قانون الكبار .. قانون الاغنياء

الحاجة: واحنا نعمل اية .. نروح فين

(نسمع بصوت مرتفع معدات ازالة)

سلامة كريم : ايه الصوت ده؟

محمد : صوت ايه مفيش اى حاجة

سلامة كريم : صوت معدات ازالة

الحاجة : يا ستار يارب

محمد : تعالوا نشوف ايه حصل

(يدخل مهندس الاوقاف)

مهندس الاوقاف : صباح الخير يا جماعة

عواد : صباح الخير ياريس

(المكان يضج بحركة وأصوات الرجال والنساء والصبيّة .. ، يروحون ويجيئون ويلتف الحضور بين واقف وجالس)

مهندس الاوقاف : فية ايه ؟ الفلاحين هنا كلهم.. ليه فيه حاجة؟

عواد : ايوه ياريس.. حاجات كتير

مهندس الاوقاف: (وهويشير إلى الجمهور) والناس دى جت منين أن شاء الله.. كل دى خلق بيتفرجو

سلامة كريم : الفرجه على عينك يا تاجر

عواد : جنازة والميت كلب

مهندس الاوقاف : ممكن بلاش تجمعات وتنظيمات.. عايزين نشوف شغلنا فى اطار القانون

عواد : شغل ايه.. ومين حضرتك ؟ ..وجاى عايز مننا ايه؟

مهندس الاوقاف : انا مهندس املاك مديرية الاوقاف

عواد : خير .. (غير فاهم) عايزين تنفذوا ايه ؟

مهندس الاوقاف : (يخرج ورقة وقلم) سياتك لو فية مفيش مانع .. تنفيذ قرارات ازالة

عواد : اى ارض ؟!

مهندس الاوقاف : الارض ديه الى احنا واقفين عليها

عواد : وبتجرف الارض. وبتهد بيوتنا ..علشان ايه ؟.. ولصالح مين

مهندس الاوقاف: ديه تنفيذ قرارات ازالة صادرة من الاوقاف.. فى اطار القانون

سلامة كريم: بس يا بشمهندس ..الارض ملكنا.. اية علاقة الاوقاف بارضنا.. وارض جدودنا وبيوت اهلنا

مهندس الاوقاف : الارض الزراعية من املاك وزارة الاوقاف ..املاك دولة .. وفى تعديات على الارض .. واتحرر محاضر تعدى فى قسم الشرطة المختص ضدكم

عواد : قول الحكومة عايزه توزع الأراضى على ناس من كوكب تانى غيرنا

مهندس الاوقاف : يا عواد تم تحرير محاضر تعدى و المحاضر اتحولت للنياحة العامة

عواد : مش حيصلى اى ازالة طول ما انا عايش .. على جثتى

مهندس الاوقاف : معنا تأمين من قوات الشرطة من القسم المختص ومديرية الامن

عواد : عاوزنا نخرج بره بيوتنا .. ونسيب ارضنا (يتمالك نفسه من البكاء)

مهندس الاوقاف : يا عواد .. التنفيذ فى اطار توجيهات الدولة للقضاء على التعديات .. وازالة المخالفات من اراضى وضع يد وبيوت من غير تراخيص

سلامة كريم : لا حول ولا قوة الا بالله

عواد : الارض بتاعتنا من ايام الملك.. مش وضع يد

مهندس الاوقاف: عايزين نشوف شغلنا .. من غير مشاكل مع الفلاحين

سلامة كريم: مش حنسكت يا بشمهندس.. و حنجمع كبار العائلات فى كل العزب

عواد : الأهالي لديهم عقود إيجار مع الاصلاح الزراعى فى كل العزب الستة ..زى العرب الكبرى - العرب الصغرى - الهلالية - الرحامنة - النجارين- عرامة

مهندس الاوقاف: انا معاى قرار ازالة لازم من تنفيذه وبعد اذنكم المعدات حتدخل الارض

عواد : مفيش اى معدات حتدخل الارض

سلامة كريم: هو فى ايه ؟ مالهم الموظفين النهاردة !!

عواد : (بإهانه) اوامر عليا يا حاج سلامة .. من فوق .. غصب عنهم

مهندس الاوقاف: مش عاوزين مشاكل ووجع دماغ مش عاوزين الشرطة تاخد الفلاحين على القسم للاعتراض ويكون التنفيذ بالقوة الجبرية والاخلاء الفورى

(يدخل محامى الاهالى)

محامى الاهالى : وقف يا استاذ .. وقف يا بشمهندس .. وقف يا معلم اللودر
 مهندس الاوقاف : مين انت ؟ .. وقف ايه!! .. يكمل اللودر
 عواد : يا بشمهندس ..الاستاذ.. محامى الفلاحين
 محامى الاهالى : انا الاستاذ محمود حمدى الكبير.. المحامى
 مهندس الاوقاف : خير ان شاء الله
 محامى الاهالى : هناك نزاعات قضائية قائمه بين الفلاحين .. وبين هيئة الأوقاف في المحاكم وان هذه
 الأرض تتبع هيئة الإصلاح الزراعى وليس هيئة الاوقاف
 مهندس الاوقاف : من مين ؟
 محامى الاهالى : من عواد كبير الفلاحين و الشيخ سلامة كريم وكبار العائلات فى ريف المنزلة
 مهندس الاوقاف : قضايا
 عواد : انت عاوزنا نطرد من الارض ونسكت
 مهندس الاوقاف : (ببرود) انا مليش مصلحة.. انا بنفذ القانون .. انا جهة تنفيذه
 عواد : عاوزين تحولوا الأرض الزراعية .. خير البلد .. لأرض مبانى
 مهندس الاوقاف : (لعواد) تانى يا حاج .. انا بنفذ القانون
 عواد : فى حاجة اسمها روح القانون
 سلامة كريم : حروح فين ولمين؟

(يدخل الراوى)

الراوى : (يوجهه كلامه للجمهور) المحكمة .. قامت بسؤال عائلات العمراوى وسيف وأبو كليلة،
 وهم جيران الأرض، فأقروا بملكيتهما للمشتريين من الخديوى منذ أكثر من ٢٠ سنة متصلة ومن قبلهم
 آباؤهم من دون منازع، وعليه حكمت المحكمة بتسليمهم الأرض ، وأن ادعاء هيئة الأوقاف المصرية
 غير صحيح، حيث إن الملكية الأقدم والأحدث لا تخصها فى شىء
 محامى الاهالى : البداية الصحيحة هى من عام ١٨٨٠ لما قام الخديوى اسماعيل بوقف ١١٦٢ فدانا
 وقفا خيرا وكان اجداد هؤلاء الفلاحين يقومون بزراعة تلك الاراضى

الرواى : (يوجهه كلامه للجمهور) بنى ليهم الملك فؤاد منازل يعيشوا فيها لتسهيل زراعتها بنظام المشاركة

عواد : كان اجدادنا الى بيشتغلو بيه بياكلو بيه

سلامة كريم: وانتهى عصر الملكية والباشوات مع الرئيس جمال عبد الناصر وثورة ٥٢

الرواى : (يوجهه كلامه للجمهور) صادرها الرئيس جمال عبد الناصر وسجلها باسم هيئة الاصلاح الزراعى وزراعتها الفلاحين ٨٥% منها تمليك بالتقسيط و ١٥% بنظام الايجار

عواد : (غاضبا) ثورة ٢٣ يوليو اتعملت عشان الفقراء.. علشان الغلابه هم الى بيعملوا ثورات .. علشان الاكل والشرب والعيشة الكريمة

سلامة كريم: (يحكى فى هدوء ويتذكر الماضى بحزن) وعشنا زمان وعاشت مصر كلها على اغانى العندليب عبد الحليم حافظ الوطنية وافلام زى فيلم رد قلبى و الناصر صلاح الدين والايدي الناعمة

عواد : مصر (صمت) فى ٥٢ اتغيرت .. مصر ناصر .. واتغير الفلاح معها .. من فلاح فى عزبة الباشا باليومية .. بقى صاحب الارض .. الفلاح زرع وحصد للبلد علشان ربنا.. و ناسها واهلها

محامى الاهالى : فعلا مع تطبيق قانون الاصلاح الزراعى الاول رقم ١٧٨ لسنة ١٩٥٢ صادرتها الدولة بموجب قانون الاصلاح الزراعى الاول وسجلتها بالشهر العقارى باسم الهيئة العامة للاصلاح الزراعى مهندس الاوقاف: يعنى اغتصب الارض من الاغنياء واعطاها للفقراء و فقط كحق انتفاع بس و ليس ملكية (يضحك)

عواد : الرئيس جمال عبدالناصر عندما نصر الفلاحين.. أخذ من الغنى وأعطى الفقير.. دلوقتى يأخدون من الفقير.. علشان يموت من الفقر و الجوع

مهندس الاوقاف : لكن الرئيس السادات اصدر قرار بأن تدير وزارة الاوقاف بعض الاراضى وتأخذ ريعها لتمويل خزانتها

الرواى: (يوجهه كلامه للجمهور) امر السادات بتولى هيئة الاوقاف ادارتها اى تأجيرها وتحصيل تأجيرها نيابة عن الاصلاح الزراعى

سلامة كريم: السادات مكنش يعرف أنه لما يرجع أراضى الإصلاح الزراعى لهيئة الأوقاف الى عملها .. أن القانون ده حيكون لطرد الفلاحين

عواد : فى حرب ٧٣ كان ايجار الارض وريعتها بتروح للجيش المصرى علشان ولادنا وجنودنا على الجبهة ضد العدو الاسرائيلى

سلامة كريم: كل بيت من بيوت الفلاحين كان فيه مجند عسكري على الضفة فى سيناء .. ضد العدو من اخ .. زوج .. اب .. ابن

كلنا مصر.. اخدنا من قوت عيالنا لنساعد الجيش فى نصر اكتوبر فى ٧٣

عواد : (يوجهه كلامه للجمهور) هزمتنا عدو واحد بعيد مش مننا .. طلع لينا الف عدو قريب عايش
وسطنا

محامى الاهالى : اما حسنى مبارك سنه ٩٢ غير قانون ايجار الارض الزراعيه وانهى عقود ايجار الفلاحين
للالارضى بنهاية السنه الزراعيه ٩٧

الرواى : (يوجهه كلامه للجمهور) فى عهد مبارك باعت الاوقاف التى لا تملكها مساحات فيها بتمن
بخس لمن لا يستحقها (يخرج)

سلامة كريم : انتهت الحرب .. وقلنا هانعيش زى بقية الخلق ونبقى فوق فى العلالى .. وحياتنا هاتتغير
.. ولا حاجه اتغيرت . وانتهت احلامنا زى ما انتهت الحرب بالظبط

مهندس الاوقاف : بلاش شعارات وخطب ملهاش ثلاثين لازمه

عواد : صح .. كفاية اقوال خيلنا فى الافعال .. اتفضل يا استاذ .. يا محامى.. كمل

محامى الاهالى : أن مطالب جميع تلك القضايا والمحاضر تتمحور حول تفعيل القانون رقم ٣ لسنة
١٩٨٦ الذى بموجبه يجب ان تتسلم هيئة الإصلاح الزراعي هذه الأراضى كاملة ولا يعود لهيئة الأوقاف
المصريه أى حق فى إدارة او التصرف فى تلك الأراضى وهذا هو مطلب الأهالى الرئيسى

عواد : الاوقاف بتتصرف فى أرض مش ملكها

سلامة كريم : يا عواد .. الاوقاف بتبيع الأرض بأقل من عشر ثمنها

عواد : وبتشرد الفلاحين

مهندس الاوقاف : : أنا مقلتش إن أنا هنا بمزاجي.. بس أنا مدام موجود هنا .. يبقى لازم هعمل
الواجبات بتاعتي مهما حصل

عواد : عارف يا باشمهندس ... البلد دي مبقاتش بتاعتنا خلاص .. اه و ربنا

سلامة كريم : يا جماعه صلوا على النبي

الجميع : عليه الصلاة والسلام

محامى الاهالى : (لمهندس الاوقاف) من النهاية نوقف .. ونشوف كلمة القضاء المصرى

مهندس الاوقاف : (ينظر فى ساعته) خلاص .. علشان الوقت .. كلنا نروح قسم الشرطة ونقفل محضر
الازالة لتعذر التنفيذ لوجود نزاع قضائى

سلامة كريم : على فين يا جماعه؟

عواد : خليك يا حاج سلامة كريم مع محمد والحاجة .. حروح معاهم قسم الشرطة وخرج على طول
سلامة كريم: طب أنا جاي معاكم

عواد : لا ..وجودك مع اهل بيتى فى الظروف ديه مهم عن انك تيجى معاى .. مش عارف ممكن يحصل
ايه

سلامة كريم : ربنا يستر

شندى : ياللا بينا يا رجاله

(يتحرك الجميع للخروج)

(لغط كثير وتداخل فى الأصوات من الخارج)

مش حنسلم

مش حنبيع

مش حنسيب الارض تضيع

الرواى:(يدخل) (يوجهه كلامه للجمهور) انتهت الازمة التى نشبت بين الاهالى وبين قوات الامن
المشاركة فى الحملة المكبره للازالة بعد تحرير محضر صلح بين الاهالى ومسئولى الاوقاف لحين
مراجعة الوضع النهائى لملكية هذه الاراضى .

(نسمع فى الخلفية موسيقى فيلم المصير لكمال الطويل)

(ظلام)

المشهد الخامس

(يفتح الستار على مكتب المقاول - ويدخل السفروت)

السفروت: باشا مصر

المقاول :كويس انك جيت فى الوقت المناسب

السفروت : خير يا كبير

المقاول : عاوزك فى شغلانه كبيرة

السفروت : خلصانه

المقاول : مش تعرف ايه المأمورية اللى عايزك فيها

السفروت : مشاجرة وعراك (يخرج سلاح ابيض من جيبه الامامى)

المقاول : لا

السفروت : التراس وكورة .. اهلى زمالك ٦-١ وكده.. بس انا بشجع الترام (يخرج صفاره الحكم من جيبه الخلفى)

المقاول : لا

السفروت : انتخابات و لم بطاقات الناس الشخصية الميتين قبل العيشين (يخرج علم مصر من الجيب الخلفى الاخر)

المقاول : (يخرج قطعه حشيش وشريط اقراص من جيبه الامامى الاخر) حشيش وترامدول وبانجو

المقاول : لا

السفروت: مش فاضل فى الجدول غير سرقة بالاكراة او اغتصاب انثى .. معلش مليش فيها

المقاول :انت صايع ووش اجرام .. بس شكلك صاحب مبدأ (يضحك)

السفروت : انا بتاع كله .. بس حاطط لنفسى اعتبارت كده

المقاول : الخلاصه .. الحدوته عواد

السفروت :السر فى الارض يا كبير

المقاول : صح .. جهز نفسك .. بس بعد ماتاخذ منى الاشارة

السفروت : خلصانه يا رئيس

المقاول : بس اهم حاجة تنفذ الخطة بالحرف

السفروت : دا انا هعمل معاه واجب السنين (يخرج السفروت)

(يدخل المحامى ومهندس الاوقاف)

المحامى : السلام عليكم

المقاول : وعليكم السلام

مهندس الاوقاف : خير يا كبير

المقاول : ندخل فى الموضوع على طول .. انا طلبت من الاستاذ المحامى نجتمع انا وهو و حضرتك مهندس الاوقاف بشكل شخصى .. هنا عندى .. فى المكتب

محامى الاهالى : (بقوة) إحنا مش متفقين على حاجة .. لا أكلمك ولا تكلمني

مهندس الاوقاف : لعل الامر يكون فيه خير

المقاول: قولى ايه اخبار الفلاحين الى عايز اشترى منهم الارض بتاعتهم

مهندس الاوقاف: مع ان كلهم مش عاوزين يبيعوا وعارفين انك هتشتري الارض باقل من سعرها بكتير الا انهم هيبيعوا كلهم هو فى حد يقدر يقول لا

المقاول : قصدك انا ظالم .. مفترى .. ضحكت عليهم

مهندس الاوقاف : مقدرش اقول كده

محامى الاهالى :بس فى مشكله صغيره كده .. عواد مش عايز يبيع .. علشان متفكرش

المقاول: متزعلش مفسك .. هيبيع بالذوء وبالعافيه هيبيع

مهندس الاوقاف: (لمحامى الاهالى) بس ماتشغلش بالك انت .. ملكش دعوه

محامى الاهالى : لا ليا دعوه

المقاول : (ببرود) فى ماتش الكورة بيكون فيه فريقين .. فريق خسران و فريق كسبان حتى فى الوقت الضايح فى الدقايق الاخيرة قبل ما الحكم ما بيصفر وياخد الدورى ويشيل الكأس .. عارفين ليه ؟

مهندس الاوقاف : ليه يا فندم ؟

محامى الاهالى : مش فاهم حاجة

المقاول : لان الفريق الكسبان متعود على المكسب وعلى البطولات والجوايز وبيلعب فى النهائيات اما الفريق الخسران مفيش امكانيات لا فلوس ولا لاعبيه ولا ادارة

مهندس الاوقاف : خلاص .. يلعب درجة تانية

المقاول : علشان كدة .. اتحاد الكورة قرر ان الفريق الخسران لازم يلعب فى دورى المظالم

محامى الاهالى : بتفكر فى ايه ؟

المقاول: فريق عواد و سلامة كريم والاهالى وحضرتك.. هو الفريق الخسران بالتلاته

محامى الاهالى : مين قال كده؟

المقاول : ولى الامر

محامى الاهالى: (غاضبا) ازاي ؟ .. انا محامى عواد والاهالى.. انت بتقول ايه ؟

المقاول : ما احنا عارفين .. انت مقولتيش معلومة جديدة

مهندس الاوقاف : كده باظت خالص

المقاول :عواد رفع قضية بالمستندات والاوراق فى المحكمة

محامى الاهالى : فعلا .. فيه دعوى قضائية مرفوعة من عواد فى المحكمة

مهندس الاوقاف: عواد قدم ورق بانه سدد ثمن الارض باكمل

محامى الاهالى : بايصلالات رسمية .. وشهادات عقارية بعدم امتلاك الاوقاف الارض

المقاول : كده نقول خلاويص

مهندس الاوقاف : فهمت

المقاول : قبل ما الاوراق والمستندات يشوفها الخير القضائي علشان يبص فيها ويشوف ادعاء عم

عواد على الطبيعة .. عاوزين الاوراق الاصلية من الاوقاف تكون معنا قبل ميعاد الجلسة الى جايه

مهندس الاوقاف : كلام فى الجون

المقاول : و خرائط الارض تكون بيضا .. ملهاش اى ملامح

مهندس الاوقاف : عندنا خرائط قديمة من السبعينات نحطها من ضمن الاوراق

المقاول : (يوجهه كلامه للمحامى) وانت؟

محامى الاهالى : يا نهارك اسود... انت اتجننت؟

المقاول : ده انت لو شغلت مخك

محامى الاهالى : انت مش حتبطل زن

المقاول : اقول تاني .. انا خازوق

محامي الاهالي : انت حر

المقاول : فلوس ملهاش اول من اخر.. اسمع مني

محامي الاهالي : لحم الغلابه في نيااب الديابه بتهبش فيه

المقاول: بلاش مواعظ وحكم .. ملهاش اى ثلاثين لازمه

مهندس الاوقاف : وعرق الناس . أنت مستعد لتمويل الشغلانه

المقاول: كل واحد مليون جنيهه (يخرج دفتر شيكاته) هتكون معايا في سكتي

مهندس الاوقاف : دي ح تحلو قوي ..والشغل ح يكون على ودنه

محامي الاهالي : (منتحياً جانباً) مستحيل .. مستحيل اعمل كده

المقاول: راسك دي ناشفة زى عواد

محامي الاهالي : انا مش معاكم .. انا مش خاين .. مقدرش اخون موكلى ولا اهلى.. مسالة مبدأ

المقاول : خلاص .. خلاص .. متزعلش نفسك ..مش معنا .. تكون مش علينا .. ع الحياذ يعنى .. لان تيار البحر شديد

محامي الاهالي : مش فاهمم قاصدك.. ده تهديد ع المكشوف

المقاول : خايف عليك قبل ما تحصل المحامي الى قبلك .. ونقرأ عليك الفاتحة.. مش مصدقنى .. تحب اثبتلك

محامي الاهالي : (بعصبية) كفايه .. كفايه

مهندس الاوقاف : و الجماعة الفلاحين؟

المقاول : الناس الى فوق مش عاوزين اى حد تحت

محامي الاهالي : عاوزين الناس تموت من الجوع والفقر والعوزه

المقاول : علشان العدد يقل .. عدد الناس بقى في الليمون

مهندس الاوقاف:(للمقاول) والناس ديه حتعمل ايه مع عواد ؟

المقاول : اكرام الميت دفنه .. ليكون عبره لباقي الفلاحين

مهندس الاوقاف : البقاءالله (يحدث نفسه) الدنيا حتحلو قوى يا واد .. والشغل حيبقى على ودنه

محامى الاهالى : عليا النعمة انت شيطان

(يصطفوا الثلاثة صفا واحدا ظهورهم للجمهور ونسمع فى الخلفية صوت طلق نارى)

الراوى: (يدخل) (وجهه كلامه للجمهور) يكفى ان نعرف ان تمن الارض على الضفة الثانية من خط سكه حديد ابى قير اللزق لشاطيء البحر حوالى ٦٠ الف جنية للفدان .. لنعرف ان تمن الفدان يعدى ١٢٠ مليون جنية فى ارض الفلاحين .. ارض المعمورة البلد

(نسمع فى الخلفية موسيقى مسلسل ليلة القبض على فاطمة لعمر خيرت)

(ظلام)

المشهد الاخير

(نرى جثته عواد ملقى على الارض الزراعية يلفظ أنفاسه الاخيرة و الشرطة تحاصر المكان والنيابة العامة بمعاينة الحادث على الطبيعة و الحاجة تمسح دموعها تتأثر مما حدث و بجوارها ابنها

محمد)

(نسمع فى الخلفية كلمات احمد فؤاد نجم "جيفارا مات"

الراوى : (يدخل) (يوجهه كلامه للجمهور) الاهالى وجدوا عم عواد الذى ناضل حتى لا يخرج من ارضه مقتولا داخل المزارع الموجودة داخل القرية وهو مربوط القدمين واليدين وملقى هلى وجهه ومكتوب على ظهر جلابيته عبارة " الدور على سلامه كريم رميا بالرصاص يا زعماء الفلاحين "

(يخرج الراوى)

(لغط كثير وتداخل فى الأصوات من الخارج)

عواد

مات

قتلوا زعيم الفلاحين

(تكرار)

الحاجة : (تلطم على خدودها) يا خراب بيتك يا اخويا .. نروح فىن من بعدك..ضيعنا من بعدك

وكيل النيابة : انتى شوفتى الحادثه

الحاجة : ملناش غيرك يا حاج .. ملناش غير ربنا .. ولا اخ بينفع ولا خال او عم بينفع

وكيل النيابة : بقولك يا حاجة .. انتى شوفتى الحادث

الحاجة : لا .. يا بيه

وكيل النيابة : ابنك ده

الحاجة : اه .. ابنى

وكيل النيابة : بتتهم مين يا محمد فى موت ابوك ؟!

الحاجة : ماتقولش مات

محمد : (متوجعا) لا يا فندم .. احنا عارفين مين اللى عملوا كده

الحاجة : اسكت .. اسكت يا محمد !

محمد : احنا بقالنا سنين عايشين فى تهديد يا فندم

وكيل النيابة: احيكى ايه الى حصل بالضبط يا محمد

الحاجة: منهم لله

وكيل النيابة : حق عواد .. وحق الناس الغلابة مش حيروح يا ست

محمد : ازاي يا باشا ؟

وكيل النيابة : بالقانون يا محمد .. وبلاش ننسى العدل الالهى

الحاجة : (بألم) ياريت يا بيه .. احنا غلابه اقوى .. ملناش غير ربنا

محمد: احنا سمعنا صوت ضرب رصاص

وكيل النيابة : (مستفسرا) سلاح نارى

محمد : كل اهالى قرية الرحمانية راحت تشوف فى ايه .. لقينا ابويا مقتول داخل الزرعات

الحاجة : (بفزع) كان مربوط القدمين من رجليه .. واليدين .. ومرمى على وشه

محمد : (بضيق) ومكتوب على ظهر جلابيته عبارة " الدور على سلامة كريم رميا بالرصاص يا زعماء الفلاحين

وكيل النيابة : (فى دهشة) ازاي ده حصل ؟

محمد : عربيه ميكرو باص ١٤ راكب رميته على الطريق مقتول

وكيل النيابة : مين دول ؟ بتتهم اى حد

محمد : دول شويه بلطجية ومقاطيع لحساب ناس كبار يا بيه

وكيل النيابة: ولصالح مين؟

محمد : طبعاً الحرامية !! .. من الى بيسرقوا البلد .. وبياكلوا قوت شعبها الغلبان

وكيل النيابة : وبعدين ؟

محمد : جت الاسعاف لنقل ابويا .. والشرطة لأخذ اقوال الناس وكبار البلد ونواب الدائرة

وكيل النيابة : (يربت على كتف الحاجة) البقاء لله

الحاجة : (تحاول ان تتماسك) احنا مش حناخذ العزاء فى جوزى يا بيه .. نجيب حقه الاول من الى
اقتله .. وساعتها يا بيه ناخذ العزاء

وكيل النيابة : يا محمد النيابة عايزه الجلابية بتاعه المرحوم عواد .. الى مكتوب عليها التهديد

محمد : حاضر يا بيه .. احنا خدامين الحكومة

وكيل النيابة : تمام .. ومنتظر نتيجة التحقيقات وتقرير الطب الشرعى .. علشان نعرف لغز القضية

الحاجة : (بتعيط) دم عواد مش حيروح هدر يا بيه

وكيل النيابة : بالقانون يا حاجة .. احنا دولة قانون

محمد : يا باشا بالقانون او بالدرع .. حق ابويا حيرجع مهما طال الزمن

الحاجة : الدنيا ليه وحشه كده يا بيه (تبكي) ... ليه احنا الغلابه ملناش مكان فيها

الرواى : (يدخل) (يوجهه كلامه للجمهور) لم تقبل عائلة عواد العزاء فى مقتل كبير عائلتها حتى تتم
معاقبة الجانى كما ان العائلة رفضت تسليم الجلابية التى كتبت عليها رسالة التهديد حتى تطلبها النيابة
رسميا (يخرج)

(يدخل سلامة كريم)

وكيل النيابة : اسمك وسنك وعملك ومحل اقامتك؟

سلامة كريم : تحت امرك يا بيه

وكيل النيابة : اسمك

سلامة كريم : اسمى سلامة كريم

وكيل النيابة : شغلتنك ايه؟

سلامة كريم : فلاح .. وصاحب ارض فى المعمورة البلد

وكيل النيابة : سنك؟

سلامة كريم : ٥٥ سنه

وكيل النيابة : محل اقامتك

سلامة كريم : المعمورة البلد

وكيل النيابة : فى جريمة قتل عواد .. عاوز اعرف حقيقة الى حصل يا حاج سلامه

سلامة كريم: يابيه .. معرفش الى حصل مكنتش موجود ساعه وقوع الجريمة

وكيل النيابة : موجود فين ساعتها ؟

سلامة كريم: مع ابن عواد وامه في الارض وفي البيت

وكيل النيابة : (يلتفت تجاة الحاجة وابنها) لو احتاجت حاجة حأناديكم !

(يخرج محمد وامه)

سلامة كريم: يا بيه .. انا من كبراء الناحيه ومن زمان صاحب واخ لعواد وعيلته

وكيل النيابة : عواد ليه اعداء ؟

سلامة كريم: يا بيه .. عواد صاحب ارض في المعمورة وراثها اب عن جد .. رجل محبوب ..خدوم..عايش علشان الناس بشندى فلاح بسيط شههم وحسن السمعة..وهو من كبراء الفلاحين

وكيل النيابة : المقصود من كلامك ملهوش اعداء .. ومفيش اى مشاكل مع حد

سلامة كريم : المشاكل مع الحكومة زى الاوقاف او الاصلاح الزراعى من قديم الزمن .. وفي قضايا في المحاكم بقالها سنين طويله

وكيل النيابة : تمام

سلامة كريم: وفي ناس حاولت تشتري ارضه بالعافيه والقوة

وكيل النيابة : ارض عواد بس؟

سلامة كريم: الناس ديه حاولت تشتري كل اراضى الفلاحين

وكيل النيابة : واشتروا الارض؟!

سلامة كريم: يا بيه .. فلاحين غلابه باعوا اراضيهم برخص التراب ..بملاليم .. بسبب العوزه والخوف والجبن

وكيل النيابة : وعواد .. باع

سلامة كريم: عواد مبعش ارضه

وكيل النيابة : ليه ؟

سلامة كريم: ارض عواد وارضى مش للبيع مهما حصل

وكيل النيابة : ولكن التهديدات لعواد وليك كانت صريحة

سلامة كريم: عيار طائش فى الهوا يا بيه

وكيل النيابة : بس عواد اتقتل يا حاج سلامة.. مش عيار فى الهوا

سلامة كريم: كان لازم التخلص منه لانه هو الحل الأخير

وكيل النيابة : ازاي ؟

سلامة كريم: علشان قتل عواد يكون عبره ليا و لباقيه الفلاحين

وكيل النيابة : فى اقوال اخرى عايز تقولها يا حاج سلامة كريم

سلامة كريم: ياباشا .. والله معوزين اي حاجه من الحكومة ..بس يسبو لنا الاراضي الي الناس عايشه فيها

الراوى : (يدخل) (يوجهه كلامه للجمهور) واصلت نيابة المنتزة ثان التحقيق فى حادث مقتل كبير العائلة بقرية الرحمانية بالمنتزة بالأسكندرية واستمعت النيابة إلى أقوال أقارب المجنى عليه وكان جثمان القتل قد شيع عصر أمس بحضور الآلاف من مواطنى قرية الرحمانية بمنطقة الإصلاح بأرياف المنتزة بعد أن أمرت نيابة المنتزة ثان بالتصريح بدفن الجثة بعد أن تم فحصها على يد الطبيب الشرعى لمعرفة أسباب الوفاة

(يدخل محامى الاهالى)

محامى الاهالى : مساء الخير يا فندم

وكيل النيابة : مساء النور .. انت محامى اهالى الفلاحين

محامى الاهالى : فعلا يا فندم

وكيل النيابة : مش خايف

محامى الاهالى : لا

وكيل النيابة : ازاي.. قلبك ميت بقى (بضحك)

محامى الاهالى : ربنا موجود .. هو الحافظ

وكيل النيابة : ونعم بالله

محامى الاهالى : واللى داق المريحس باوجاع الناس

الراوى : (يدخل) (يوجهه كلامه للجمهور) كان حامد ابراهيم جويلى اول محامى اكتشف ان الارض اصلاح زراعى وفضح الدنيا وخطفوا من امام المحكمة وقتلوه ونحن وجدناه جثته هامده على كوبرى فصر المنتزة مقيد اليدين والقدمين وشبه عارى (يخرج)

وكيل النيابة : كنت اخر وقت مع عواد امتى ؟ وفين ؟

محامى الاهالى: كنا فى الارض اثناء تنفيذ الازالة يا بيه

وكيل النيابة : وبعدين؟

محامى الاهالى: راح عواد ومسؤول الاوقاف وانا .. لقسم شرطة المنتزة تانى

وكيل النيابة : ليه؟

محامى الاهالى: لقفل المحضر فى القسم وكتابة عواد اقرار تعهد بعدم التعرض للحملة وللموظف و لمعدات الازالة

وكيل النيابة: (لمحامى الاهالى) عملتوا محضر الشرطة والتعهد القانونى

محامى الاهالى : حصل يا فندم.. عملنا الاجراءات القانونية والادارية

وكيل النيابة: تمام

محامى الاهالى : حررنا مذكرة فى القسم بتوصيات برد الأرض موضوع النزاع لهيئة الإصلاح الزراعى وتمكين هيئة الإصلاح الزراعى من ممارسة عمله و إعادة الأراضي للفلاحين

وكيل النيابة : و عواد ؟

محامى الاهالى : مش عارف راح على فين .. انا مشيت من القسم لوحدى

وكيل النيابة : ع فين ؟

محامى الاهالى : لميعاد سابق

وكيل النيابة : مع مين؟

محامى الاهالى : مع هشام بيه السوهاجى .. المقاول

سلامة كريم: (لوكيل النيابة) ده المقاول الى كان عاوز يشتري الارض غصب مننا يا بيه

(يدخل المقاول)

المقاول: معالى المستشار

وكيل النيابة : اتفضل

المقاول : جريمة بشعه .. شىء غريب .. الف رحمه ونور على عم عواد .. من اعز الناس

وكبل النيابة : مش معقول

المقاول : عشره عمر .. يا بيه

وكيل النيابة : (يلتفت تجاة سلامة كريم والمحامى) لو احتاجت حاجة حأناديكم !

سلامة كريم: حاضر

(يخرج سلامة كريم ومحامى الاهالى)

وكيل النيابة: انتى بقى الى الناس بتشتكى منك اه انت هتعترف بالحقيقه و لا ناوى تتعب قلبى معاك

المقاول: مش عارف حضرتك عايز منى ايه .. ومين الى اشتكى منى

وكيل النيابة : اه يعنى ناوى تتعب قلبى معاك ماشى

المقاول : انا

وكيل النيابة : محتاج شويه معلومات بسيطة منك

المقاول : تحت امرك

وكيل النيابة : تمام

المقاول : احنا فى خدمة العدالة

(يأخذ وكيل النيابة عده خطوات ويقترب من المقاول)

وكيل النيابة : اسمك وسنك وعملك ومحل اقامتك؟

المقاول :انتم عارفين كل شىء عنى .. ليه السؤال؟

وكيل النيابة : تحقيق رسمى .. ولازم نسمع اقوالك

المقاول: حاضر

وكيل النيابة : اسمك ثلاثى

المقاول: شريف عثمان السوهاجى والشهرة شريف السوهاجى

وكيل النيابة : سنك

المقاول: ٤٢ سنه

وكيل النيابة: بتشغل ايه؟

المقاول : رجل اعمال .. و صاحب شركة للاستثمار العقارى

وكيل النيابة: ساكن فين؟

المقاول: محطة الرمل

وكيل النيابة : من اقوال الفلاحين فى التحقيق .. انك عرضت على الفلاحين شراء اراضيهم باى تمن .. واشتريت جزء كبير من الاراضى فى وقت قصير

المقاول : الواقع ..انا بره الموضوع .. فى رجال اعمال مصريين ومن الخليج اشترى الاراضى .. و عواد وسلامة رفضوا البيع

وكيل النيابة : وكان دور سيادتك فى البيع ايه ؟

المقاول: مجرد فاعل خير

وكيل النيابة: الاهالى زعلانه من موقفك من بيع اراضيهم .. وعدم الوقوف معاها فى صفهم وبالعكس الوقوف فى الصف الاخر

المقاول : التجارة شطارة .. والبنس ملهوش قلب .. والعواطف بره الحسابات

وكيل النيابة : جوعت ناس وفقرتهم وقطعت رزقهم علشان تأكل ناس تانية

المقاول : انى ممكن ابيع اى شئ الدنيا

وكيل النيابة: دى تجارة موت

المقاول : معلش ... ديه فلوس و مكسب مضمون

وكيل النيابة : وتبوير اراضيهم ..وتدمير الرقعة الزراعية

المقاول: يا باشا الى يصعب عليك يفكر

وكيل النيابة : انت قمت بالاشتراك فى عمليات التدبير وإجراءات الاغتصاب وتهديد الفلاحين

المقاول: انا معرفش حاجة عن الكلام ده .. انا مجرد سمسار اراضى

وكيل النيابة : (مقاطعا) وإرغام بعضهم على التنازل عن الأرض جنبا إلى جنب مع إكراههم على التوقيع على مبالغ مالية توحى بأنها جزء من صفقة " خلو رجل

(يدخل اليهم محامى الاهالى مسرعا)

محامى الاهالى: (بقوة) سيادة وكيل النيابة .. الثورة فى كل مكان فى مصر .. الناس فى القائد ابراهيم ومحطة الرمل

المقاول: انت بتقول ايه.. ازاى ؟ مش معقول

المقال : (محدثا نفسه) كارثة .. مصيبه .. خراب بيوت

محامى الاهالى : (فرحا) سامعين صوت الناس الغلبة من شباب وفلاحين وعمال فى الشارع .. اللعبة انتهت .. جيم او فر .. عيش .. حرية .. عدالة ..

(هرج كبير وهتافات غاضبه فى الخارج)

عيش .. حرية .. عدالة اجتماعية

الشعب يريد إسقاط النظام .. الشعب يريد إسقاط النظام

واحد اتنين .. حقى فى بلدى فى

(تكرار)

محامى الاهالى : الشعب يريد اسقاط النظام .. مرة واحدة بقى احس انى عايش .. عشان انا استهال اعيش ... مش عايش و خلاص ايوه انا جاى للميدان (يخرج المحامى)

(فاصل من الفيديو للمظاهرات فى ٢٥ يناير ٢٠١١)

المقال : (مفزوعا) مش عارف اقول ايه .. ضعنا .. روحنا فى داهية

وكيل النيابة : مين انتم ؟

المقال : مش عارف .. شغلنا راح فى القازوزه .. فلوسنا اتبخرت فى هوا

وكيل النيابة : (يضحك) البلد قامت .. والناس فاقت .. انت بقيت مواطن عادى .. زى اى واحد من الناس .. صوت ثورة الفلاحين والغلبة على

المقال : كله رايح يا باشا .. ربنا يستر فى الى جاى علينا

وكيل النيابة : نرجع للقضية علشان نقفل صفحة التاريخ الى فات .. ونبدء من اول السطر

المقال : انا معرفش حاجة عن جريمة القتل

وكيل النيابة : والتهديد والترغيب للفلاحين

المقال : مش ممكن

وكيل النيابة : انت مشتغلتش معاهم بأسلوب العصا والجزرة

المقال : ازاي ؟

وكيل النيابة: (غاضبا) انت مش طلبت من عواد وسلامة كريم وباقيه الفلاحين بترك الأرض التي يزرعونها فوراً وبالحسنى وإلا ستتخذ الإجراءات لطردهم منها بالقوة

المقاول: كذب

وكيل النيابة: (ضاحكا) خايف تتباع من الناس الكبار

المقاول: (بأنكسار) هو انا لسه حتباع .. انا اتبعت خلاص

وكيل النيابة: انت بعت اهلك وناسك وعزوتك علشان ناس تانية بشوية فلوس ونفوذ

المقاول: انا مش حاعترف على نفسى

وكيل النيابة: وانا كنت فاكراك بتفهم

المقاول: يا باشا .. انا مش حدف فاتورة اكل وشرب ناس تانية

وكيل النيابة: احنا عاوزين الناس ديه واللى تحتهم .. الظلمة ومستغلى النفوذ والضلاية والقتله وتجار السلاح وتجار الغاز وتجار البشر والأعضاء وحرامية الدعم ومروجى التوريث

المقاول: (في حالة قلق) زى ماتشوف .. أنا مستعد لكل طلباتك

وكيل النيابة: عارف ان الارض حترجع للفلاحين تانى بالقانون .. لأن الارض باعها من لايملكها ...لمن لا يستحقها

المقاول: والله ما أنا عارف اللي عملته ده صح ولا غلط

وكيل النيابة: انت محبوس ٤٥ يوم علي ذمة قضايا تريح وفساد .. واستكمال التحقيقات في قضية قتل شندى شهيد الفلاحين

المقاول: ليه يا بيه ؟؟؟؟

الرواي: (يدخل) (يوجهه كلامه للجمهور) ورد التقرير الطبى على ان عم عواد قتل بسبب تعاطيه الهيروين بالرغم من انه لم يتعاط مخدر طيله حياته وكان يحظى بأحترام جميع اهالى القرية

(فترة صمت)

وكيل النيابة: دى قضية رأى عام .. ومش عايزين الموضوع يطول عن كده .. أن الوطن باق والأشخاص زاءلون .. وخط أحمر بعد كده والقانون يطبق على الكل .. كبير وصغير

الرواي: (يدخل) (يوجهه كلامه للجمهور) ايها السيدات والسادة .. المسرحية اللى شوفتوها اليوم مسرحية واقعية .. وكل تشابه بين شخوصها وابطالها الحقيقيين هو مش صدفة .. بس القصة الحقيقية في الحدوتة ان عواد بتاعنا هو شهيد الفلاحين "حسن عبد الرازق شندى" كبير "عائلة شندى"

والبالغ من العمر ٥٢ عاما . واللعبه علشان الرقابة وحق الورثة.. اما عواد بتاع الاوبريت هو عنانى احمد عواد المفاجأة انه مبعش ارضه ومات مدافعا عنها وتعود القصة الى العصر الملكى بالشرقية وحكاية عواد مع البرنس محمد على ابن الخديوى صاحب المقولة الشهيرة انتم عبید احساننا وشقيق الخديوى عباس حلمى الثانى واكثر ما اصابه فى مقتل سلاح الخسة والخيانة زى حسن عبد الرازق شندى زعيم فلاحى المعمورة. الاتنين لم يفرطوا فى شبر واحد من ارضهم ودفعوا عن حياتهم ثمن الارض.

(يخرج الجميع)

(نشاهد فى الخلفية خطاب الرئيس مبارك الاخير ١٠ فبراير ٢٠١١)

ثم ترفع شاشة السينما ليظهر المسرح

(يسمع صوت اذاعة التلفزيون المصرى خطاب اللواء عمر سليمان يعلن تنحي الرئيس مبارك عن منصبه فى السادسة من مساء الجمعة ١١ فبراير ٢٠١١)

.بِسْمِ اللَّهِ الرَّحْمَنِ الرَّحِيمِ أيها المواطنون فى ظل هذه الظروف العصيبة التى تمر بها البلاد قرر الرئيس محمد حسنى مبارك تخليه عن منصب رئيس الجمهورية وكلف المجلس الأعلى للقوات المسلحة بإدارة شؤون البلاد. والله الموفق والمستعان.

(ستار)

تمت بحمد الله

بسام حسن محمد

البريد الإلكتروني: BASSAM 1911980@GMAIL.COM

الهاتف: ٠١٢٠٨٤٥٩٠٠٩